

ХОЁРДУГААР БҮЛЭГ

ЗЭВСЭГТ ХҮЧНИЙ ТЭЭВРИЙН ХЯНАЛТЫН АЛБЫГ ЗОХИОН БАЙГУУЛАХ

Нийтлэг үндэслэл

39. Зэвсэгт хүчний Тээврийн хяналтын алба /ТХА/ “Замын хөдөлгөөний аюулгүй байдлын тухай”, “Авто тээврийн тухай” хуулиуд, Замын хөдөлгөөний дүрэм, Батлан хамгаалахын сайд, ЗХЖШ /ХХЕГ, ДЦ, ОБЕГ/-ын даргын цэргийн тээвэрлэлт техникийн ашиглалт, хөдөлгөөний аюулгүй байдлыг хангах тухай гаргасан тушаал, заавар, журмын биелэлтэд байгаад хяналт тавих, хөдөлгөөний аюулгүй байдлыг хангуулах, зам тээврийн хэрэг зөрчлөөс урьдчилан сэргийлэх, цэргийн төмөр замын, агаарын болон авто тээврийн хяналт, зохицуулалтыг төлөвлөн хэрэгжүүлнэ.

Зэвсэгт хүчний Тээврийн хяналтын албаны мэргэжилтэн, зохицуулагч, хэрэг бүртгэгч офицер, цагдаа зохицуулагч нар цагдаагийн дүрэмт хувцас хэрэглэн, Тээврийн цагдаагийн албаны хөдөлгөөний аюулгүй байдал хариуцсан зохицуулагч нарын адил эрх эдэлнэ.

ТХА нь ажлын тусгай байр, холбооны хэрэгсэл, чанга яригч, тусгай дуут болон гэрлэн дохиогоор тоноглогдсон цагдаагийн тусгай бичиглэл бүхий хамгаалалт, эргүүлийн авто тээврийн хэрэгсэлтэй байхаас гадна “Зэвсэгт хүчний Тээврийн хяналтын алба” гэсэн албан бичгийн хуудас, тэмдэг хэрэглэнэ.

Зэвсэгт хүчний Тээврийн хяналтын алба нь Тээврийн цагдаагийн албатай мэргэжлийн чиг үүргээр хамтран ажиллах гэрээг Зэвсэгт хүчний Жанжин штаб, Цагдаагийн ерөнхий газартай байгуулж болно.

ТХА-ын ажлын байранд хүрээний ба түүний ойролцоох хот, суурингийн нутаг дэвсгэрийн замын сүлжээ, ангиудын байршил, техникийн эргүүл, хяналтын цэгүүд, Тээврийн цагдаагийн газар, түүний харьяа хэлтэс, тасгуудын жижүүрийн цэгүүдийн байрлалыг харуулсан бүдүүвч, шаардлагатай утасны жагсаалт, эргүүлийн үүрэг, эргүүлийн тээврийн хэрэгслийг ашиглах заавар байна.

ТХА нь цэргийн техниктэй тээвэрлэлттэй холбогдолтой хэрэг зөрчил гарсан тухай мэдээллийг хүлээн авмагц хэргийн газарт очиж үзлэг хийх ба Тээврийн цагдаагийн хэлтэс, тасгуудтай хамтран шийдвэрлэж, цэргийн тээвэрлэлт дүрэм, журмын зөрчил, зам тээврийн осол, зөрчлийг Монгол улсын хууль тогтоомжид заасны дагуу арга хэмжээ авч ажиллана.

Саатуулан журамлагдсан авто тээврийн хэрэгслийг байрлуулахын тулд цэргийн хүрээнд техник саатуулах байрыг зохион байгуулж, түүний даргаар ТХА-ны байцаагч нараас томилно.

ЗЭВСЭГТ ХҮЧНИЙ ТЭЭВРИЙН ХЯНАЛТЫН АЛБАНЫ ДАРГА

40. **Тээврийн хяналтын албаны дарга нь** цэргийн тээвэрлэлт, цэргийн ангийн зэвсэглэл, цэргийн техникийн цувааны хөдөлгөөний аюулгүй байдлыг хангах, зам тээврийн осол зөрчлөөс урьдчилан сэргийлэх ажиллагааг зохион байгуулж хэрэгжүүлэх ажлыг хариуцаж, албаны хувьд ЗХЖШ-ын нэгдүгээр орлогч даргад шууд захирагдана.

Тээврийн хяналтын албаны даргын үүрэг:

40.1. “Замын хөдөлгөөний аюулгүй байдлын тухай” Монгол Улсын хууль, Замын хөдөлгөөний дүрэм, цэргийн тээвэрлэлт, цэргийн авто техник ашиглах журмын биелэлтэд хяналт тавих;

40.2. Зэвсэгт хүчний ангиудаас авто тээврийн хэрэгслийн хөдөлгөөнд оролцох маршрут, агаарын, авто ба төмөр замын тээврийн бүдүүвчийг боловсруулж, Тээврийн цагдаагийн албатай тохиролцон мөрдүүлэх ажлыг зохион байгуулах;

40.3. Зэвсэгт хүчний ангиудын авто тээврийн хэрэгслийн жолооч нараас замын хөдөлгөөний дүрмийн шалгалт авах комиссын ажлыг удирдах, тээврийн хэрэгслийн улсын үзлэг тооллогыг Батлан хамгаалах салбарт зохион байгуулах;

40.4. Замын хөдөлгөөний аюулгүй байдлын эсрэг гэмт хэрэг, ослын тухай мэдээллийг хүлээн авах, бүртгэх, бүрэлдэхүүнийг томилж ажиллуулах, гэмт хэрэг ослын газарт үзлэг хийх ажлыг зохион байгуулж, орон нутгийн цагдаагийн байгууллагад мэдэгдэн хамтран ажиллах, осол зөрчлийн талаар ЗХЖШ-ын шуурхай жижүүр болон холбогдох дарга нарт мэдэгдэх;

40.5. ЗХЖШ-ын даргын баталсан удирдамжийн дагуу Зэвсэгт хүчний ангиудын автотехникийн ашиглалт, хадгалалт, тавиулангийн алба, түүний элементүүд, техник шалгах байрны даргын үйл ажиллагааг шалгах ажлыг зохион байгуулж, дүгнэлт гаргах;

40.6. Тээврийн цагдаагийн албаны даргын баталсан хуваарийн дагуу орон нутаг /дүүрэг/-ийн замын цагдаагийн хэлтэс, тасгуудтай хамтран хяналт, шалгалт зохицуулалтын ажлыг зохион байгуулах;

40.7. Батлан хамгаалах салбарын гадаад харилцаа, хамтын ажиллагааны чиглэлээр ирсэн зочид, төлөөлөгчдийн хөдөлгөөний аюулгүй байдлыг хангуулах ажлыг зохион байгуулах;

40.8. Зам тээврийн осол, хэргийн материалын бүрдэлтийг шалгаж, тогтоосон хугацаанд холбогдох хууль хяналтын байгууллагад шилжүүлэх;

40.9. Зэвсэгт хүчинд замын хөдөлгөөний аюулгүй байдлыг хангуулах, авто тээврийн хэрэгслийн ашиглалтыг сайжруулах талаар журам, заавар боловсруулах;

40.10. Батлан хамгаалах салбарын тээврийн бүлгийн автомашин, зам тээврийн осол хэргийн мэдээллийн санг бүрдүүлж, хяналт тавих;

40.11. Батлан хамгаалахын сайд, ЗХЖШ-ын даргын тушаалаар тээврийн бүлгийн автомашинуудад улсын дугаар олгох;

40.12. Төрийн ёслолд оролцох хүндэт харуулын бие бүрэлдэхүүн, олон улсын болон анги, салбарын хээрийн гаралт, дадлага сургууль, нэгдсэн ажиллагааны цэргийн тээвэрлэлт, хөдөлгөөний аюулгүй байдлыг хангуулах ажлыг зохион байгуулах.

40.13. Тээврийн цагдаагийн албанаас зохион хэрэгжүүлж буй нэгдсэн болон хэсэгчилсэн арга хэмжээ, зочид төлөөлөгчийн хамгаалалтад бие бүрэлдэхүүнийг оролцуулах;

40.14. Зэвсэгт хүчний анги Цагдаагийн байгууллагад дэмжлэг үзүүлэх, бүрэлдэхүүний хөдөлгөөний аюулгүй байдлыг хангуулах ажлыг зохион байгуулах;

40.15. Зэвсэгт хүчний хэмжээнд явагдаж байгаа ангилал ахиулах

сургалтанд хяналт тавьж, мэргэжлийн байгууллагуудтай хамтарч ажиллана.

41. Зэвсэгт хүчний Тээврийн хяналтын албаны хөдөлгөөний аюулгүй байдал хариуцсан ахлах зохицуулагч

ТХА-ны хөдөлгөөний аюулгүй байдал хариуцсан ахлах зохицуулагч зам тээврийн осол, хэрэг зөрчлийн бүртгэлийг хөтлөх, авто техникийн хяналтын албаны дотоод ажил, баримт бичгийн боловсруулалт, хадгалалт хамгаалалтын ажлыг хариуцаж ТХА-ны даргад шууд захирагдана.

Тээврийн хяналтын албаны хөдөлгөөний аюулгүй байдал хариуцсан ахлах зохицуулагчийн үүрэг:

41.1. Зэвсэгт хүчинд гарсан зам тээврийн осол, хэрэг зөрчилд дүн шинжилгээ хийх;

41.2. Замын хөдөлгөөний аюулгүй байдлыг хангуулах талаар зөвлөмж боловсруулж, анги, байгууллагуудад хүргүүлэх, замын хөдөлгөөний дүрмийг сурталчлах, осол зөрчлөөс урьдчилан сэргийлэх ажлыг зохион байгуулах;

41.3. ТХА-ны эргүүл, жижүүрлэлтийн ажиллагааг удирдан зохион байгуулж, хяналт тавих;

41.4. Албаны бие бүрэлдэхүүний ажлыг дүгнэж албаны даргад сар тутам илтгэх;

41.5. Албаны даргын эзгүйд түүнийг орлож, албаны ажиллагааг зохион байгуулах;

41.6. Гадаадын зочид төлөөлөгчид, төрийн ёслолд оролцох хүндэт харуулын бие бүрэлдэхүүн, анги, салбарын хээрийн гаралт, сургалтын төвд, дадлага, сургууль хийх БХЯ, ЗХЖШ, Тээврийн цагдаагийн албанаас хэрэгжүүлж буй нэгдсэн болон хэсэгчилсэн ажиллагаа, тусгай үүргийн бие бүрэлдэхүүний техник хэрэгслийн хөдөлгөөний аюулгүй байдлыг хангахын тулд тээврийн цагдаагийн албаны холбогдох хэлтэс, тасгуудтай хамтран ажиллах, хяналт тавих;

41.7. ангийн тээврийн бүлгийн автомашины улсын дугаарын бүртгэл, карт, цэргийн хүрээнээс гадагш ажилд томилогдсон ба цэргийн хүрээ, хотхоноос ирсэн болон саатуулагдсан тээврийн хэрэгслийн бүртгэлд хяналт тавих;

41.8. тээврийн хэрэгсэлийн түр саатуулах байрны ажиллагааг удирдах;

41.9. баяр, амралтын өдрүүдэд хүрээний ангиас хөдөлгөөнд оролцох автомашинд хязгаарлалт тогтоох, хяналт тавих;

41.10. Зэвсэгт хүчний анги, байгууллагын тээврийн бүлгийн авто техникийн болон тэдгээрийн жолооч нарын дэлгэрэнгүй судалгааг гаргуулах;

41.11. Зам тээврийн осол, хэргийн газарт ажиллах бүрэлдэхүүнийг биечлэн удирдах;

41.12. Анги, аж ахуйн нэгж, иргэдээс ирсэн өргөдөл, гомдлын шийдвэрлэлтэд хяналт тавих;

41.13. Албаны дотоод ажлыг хариуцан, зохицуулагч нарын хяналт-шалгалтын ажилд үнэлэлт дүгнэлт өгч, ТХА-ны даргад танилцуулах;

41.14. Тээврийн цагдаагийн албаны шуурхай жижүүртэй тогтмол холбогдож зам тээврийн гэмт хэрэг, осол зөрчлийн талаарх мэдээг өгнө.

ЗЭВСЭГТ ХҮЧНИЙ ТЭЭВРИЙН ХЯНАЛТЫН АЛБАНЫ ЗАХИРГААНЫ ХЭРЭГ БҮРТГЭГЧ

42. Зэвсэгт хүчний хэмжээнд гарч буй тээврийн хэрэгслийн хөдөлгөөний аюулгүй байдал, ашиглалтын журмын эсрэг гэмт хэрэг, зөрчилд хуульд заасан үндэслэл журмын дагуу захиргааны хэрэг бүртгэлтийн ажиллагаа явуулж, гэмт хэрэг зөрчлөөс урьдчилан сэргийлэх, хөдөлгөөний аюулгүй байдал хариуцсан зохицуулагч нарын нэгэн адил үүрэг хүлээж ТХА-ны даргад шууд захирагдана.

Тээврийн хяналтын албаны захиргааны хэрэг бүртгэгчийн үүрэг:

42. Зэвсэгт хүчний ангиудын алба хаагч нартай холбогдолтой осол, зөрчлийн газарт очиж ажиллах;

42.1. Зэвсэгт хүчний анги, аж ахуйн нэгж, иргэд байгууллагаас ирүүлсэн өргөдөл, гомдол, мэдээллийг хүлээн авч, холбогдох хууль, тогтоомжийн дагуу хуульд заасан хугацаанд багтаан шийдвэрлэх;

42.3. Цэргийн алба хаагчидтай холбогдолтой зам тээврийн осол, зөрчлийг шийдвэрлэх, харъяаллын дагуу холбогдох байгууллагуудад шилжүүлэх;

42.4. Шалган шийдвэрлэсэн захиргааны зөрчлийг арилгах зорилгоор холбогдох анги, аж ахуйн нэгжид хэрэг бүртгэгчийн мэдэгдэл бичиж хариуг авах;

42.5. Захиргааны хэрэг бүртгэгчид хөтлөгдвөл зохих бүртгэлүүдийг журмын дагуу хөтлөж, бүртгэх;

42.6. Тээврийн цагдаагийн алба, дүүргүүдийн замын цагдаагийн хэлтэс, тасгуудын захиргааны хэрэг бүртгэгч нартай хамтран ажиллах;

42.7. Тээврийн хэрэгслийн хөдөлгөөний аюулгүй байдлын улмаас анги, байгууллага, аж ахуйн нэгж, иргэдэд учирсан эд материалын хохирлыг барагдуулж, нөхөн төлүүлэх;

42.8. Зам тээврийн осол, зөрчилд дүн шинжилгээ хийж, албаны даргыг үнэн бодит мэдээллээр хангах;

42.9. Хуваарийн дагуу хариуцуулж өгсөн нутаг, дэвсгэрт замын хөдөлгөөнийг зохицуулах, хяналт шалгалт явуулна.

ЗЭВСЭГТ ХҮЧНИЙ ТЭЭВРИЙН ХЯНАЛТЫН АЛБАНЫ ХӨДӨЛГӨӨНИЙ АЮУЛГҮЙ БАЙДАЛ ХАРИУЦСАН ЗОХИЦУУЛАГЧ

43. ТХА-ны хөдөлгөөний аюулгүй байдал хариуцсан зохицуулагч нь Зэвсэгт хүчний Тээврийн хяналтын албаны хөдөлгөөний аюулгүй байдал, цэргийн хүрээ, хотхоны хариуцуулсан нутаг дэвсгэрийн хөдөлгөөний аюулгүй байдалд хяналт тавих ажлыг хариуцаж, ТХА-ны даргад шууд удирдлагад үүрэг гүйцэтгэнэ.

Тээврийн хяналтын албаны хөдөлгөөний аюулгүй байдал хариуцсан зохицуулагчийн үүрэг:

43.1. Хариуцуулсан нутаг дэвсгэрт цэргийн тээвэрлэлтийн аюулгүй байдлыг хангуулах, тээврийн замд хяналт, шалгалт, зохицуулалт хийх,

43.2. Зэвсэгт хүчний ангиудын холбогдох албан тушаалтнуудтай хамтран зам тээврийн гэмт хэрэг, осол зөрчлөөс урьдчилан сэргийлэх ажлыг зохион байгуулах;

43.3. Хариуцсан ангиудын техникийн ажилтан, жолооч нарын дүрмийн мэдлэг, жолоодлогын дадлагыг шалгаж, үнэлэлт дүгнэлт өгөх;

43.4 Зам тээврийн гэмт хэрэг, осол зөрчлийн газарт шуурхай очиж, хэргийн материалыг бүрдүүлж, Тээврийн цагдаагийн алба, хэлтэс, тасгуудтай хамтран ажиллах;

43.5 Ангиудын хээрийн дадлага, сургууль, нэгдсэн арга хэмжээнд оролцох, хүрээ, хотхоноос гадагш явах тээврийн хэрэгсэлийг шалгах, жолооч нарт зааварчилгаа өгч, замын хуудсанд тэмдэглэх, хөдөлгөөний аюулгүй байдлыг хангуулах;

43.6 Хариуцсан ангиудын автомашинуудын ашиглалтыг шалгаж, дүгнэлт өгөх;

43.7 Зам тээврийн осол гаргасан, согтуугаар болон хөдөлгөөнд аюул учруулж болзошгүй бүрэн бус, улсын дугааргүй, шилжилт хөдөлгөөн хийгдээгүй авто тээврийн хэрэгсэл жолоодсон жолоочийн үнэмлэх, техникийн бичиг баримтыг түр хурааж, зөрчлийг шийдвэрлэж дуустал тээврийн хэрэгслийг түр саатуулах байранд байлгах;

43.8 Ангиудын хүн тээврийн автобус, автомашины ашиглалт, бүрэн бүтэн байдал, явах маршрутад тогтмол хяналт тавих;

43.9 Анги, аж ахуйн нэгж, иргэдээс ирсэн өргөдөл, гомдлыг хүлээн авч хуулинд заасан хугацаанд шийдвэрлэх;

43.10 Гадаадын зочид төлөөлөгчид, төрийн ёслолд оролцох хүндэт харуулын бие бүрэлдэхүүний цувааны хөдөлгөөний аюулгүй байдлыг хангуулах; 43.11 Тээврийн цагдаагийн албанаас хэрэгжүүлж буй нэгдсэн болон хэсэгчилсэн арга хэмжээнд үүрэг гүйцэтгэх;

ЗЭВСЭГТ ХҮЧНИЙ ТЭЭВРИЙН ХЯНАЛТЫН АЛБАНЫ МЭДЭЭЛЭЛ СУДАЛГААНЫ МЭРГЭЖИЛТЭН

44. Тээврийн хяналтын албаны мэдээлэл судалгааны мэргэжилтэн нь Батлан хамгаалах салбарын тээврийн хэрэгсэлийг бүртгэж, гэрчилгээ улсын дугаар олгох, бүртгэлээс хасах, тоо бүртгэлийг хөтлөх, Зэвсэгт хүчний хэмжээнд гарсан зам тээврийн гэмт хэрэг, осол зөрчлийн талаарх судалгааг гаргаж, хөдөлгөөний аюулгүй байдал хариуцсан зохицуулагч нарын нэгэн адил үүрэг хүлээж ТХА-ны даргад шууд захирагдана.

Тээврийн хяналтын албаны мэдээлэл судалгааны мэргэжилтэн үүрэг:

44.1 Батлан хамгаалах салбарт ашиглагдаж байгаа тээврийн бүлгийн автомашин, механизмын дэлгэрэнгүй судалгаа, зам тээврийн осол, хэрэг зөрчлийн талаарх мэдээллийн санг хөтөлж, шаардлагатай лавлагааг гаргах;

44.2 Батлан хамгаалахын сайд, ЗХЖШ-ын даргын тушаал, ТХА-ны даргын шийдвэрийн дагуу Зэвсэгт хүчний ангиудын автомашин, механизмын улсын дугаар, тээврийн хэрэгслийн гэрчилгээг ТХА-ны даргаар батлуулан олгох;

44.3 Тээврийн хэрэгсэлийн хөдөлгүүр, өнгө, зориулалт өөрчлөгдсөн, шилжилт хөдөлгөөнийг тухай бүрт хийж бүртгэлд авах;

44.4 Батлан хамгаалах салбарын тээврийн хяналтын үзлэг, тооллогын дүнг нэгтгэх;

44.5 Ангиудын жагсаал, байлдааны бүлгийн автотехникт гэрчилгээ олгож, бүртгэл тооцоонд авах;

44.6. Зэвсэгт хүчинд зам тээврийн гэмт хэрэг, осол зөрчил, учирсан

хохирлын хэмжээ, авсан арга хэмжээний талаар дэлгэрэнгүй бүртгэл хөтлөх;
44.7. Эрүүгийн болон иргэний хэрэгтэй холбогдуулж шүүх, прокурор, хэрэг бүртгэх, мөрдөн байцаах байгууллагаас тээврийн хэрэгслийн бүртгэлтэй холбогдсон лавлагааг албаны даргын зөвшөөрлөөр бичгээр гаргаж өгөх. Бусад тохиолдолд Зэвсэгт хүчний анги, байгууллагуудын тээврийн хэрэгслийн хаягийн лавлагааг гаргаж өгөхийг хориглох;

44.8. Зам тээврийн ослын улмаас тээврийн хэрэгсэлд учирсан хохирлын хэмжээ, эрүүгийн хэрэг үүсэх тохиолдолд улсын дугаарыг албаны даргын зөвшөөрлөөр түр хураан авч техникийн шаардлага хангасан тохиолдолд буцааж олгох;

44.9. Улсын дугаарыг хууль бусаар хийх буюу хэрэглэсэн, бусдын дугаар ашигласан тохиолдолд улсын дугаарыг хурааж “Монгол улсын Зөрчлийн тухай хууль”-аар хариуцлага тооцох;

44.10. Албаны бичиг хэргийг стандартын дагуу боловсруулж, хөтлөх;

44.11. Нэгдсэн буюу хэсэгчилсэн хяналт шалгалтанд хуваарийн дагуу ажиллана.

ЗЭВСЭГТ ХҮЧНИЙ ТЭЭВРИЙН ХЯНАЛТЫН АЛБАНЫ УРЬДЧИЛАН СЭРГИЙЛЭХ, ОЛОН НИЙТТЭЙ ХАРИЛЦАХ МЭРГЭЖИЛТЭН

45. Зэвсэгт хүчний хэмжээнд цэргийн тээвэрлэлт, замын хөдөлгөөний аюулгүй байдлыг хангуулах, тээврийн хэрэгслийн хөдөлгөөний аюулгүй байдал, ашиглалтын журмын эсрэг гэмт хэрэг, осол зөрчлөөс урьдчилан сэргийлэх, Зэвсэгт хүчний алба хаагчдын дунд замын хөдөлгөөний хууль дүрмийг сурталчлах, албаны үйл ажиллагааг олон нийтэд таниулах, офицер, ахлагч, ажилчин, алба хаагчид, иргэдийн санал хүсэлтийг хүлээн авч үйл ажиллагаандаа хэрэгжүүлэн хөдөлгөөний аюулгүй байдал хариуцсан зохицуулагч нарын нэгэн адил үүрэг хүлээж ТХА-ны даргад шууд захирагдана.

Тээврийн хяналтын албаны урьдчилан сэргийлэх, олон нийттэй харилцах мэргэжилтэний үүрэг:

45.1. Зэвсэгт хүчний анги, байгууллага, аж ахуйн нэгжүүдийн жолооч, техникийн ажилтнуудад Монгол Улсын “Замын хөдөлгөөний аюулгүй байдлын тухай”, “Авто тээврийн тухай” хуулиуд, Замын хөдөлгөөний дүрэм, Авто тээврийн салбарт мөрдөх үндэсний стандартыг сурталчлах талаар төлөвлөгөө гарган батлуулж ажиллах;

45.2. Төлөвлөгөөний дагуу Зэвсэгт хүчний анги, байгууллагуудад замын хөдөлгөөний аюулгүй байдлын эсрэг гэмт хэрэг, осол зөрчлөөс урьдчилан сэргийлэх сургалт, сурталчилгааны ажил явуулах;

45.3. БХ-ын сайд, ЗХЖШ-ын дарга, Тээврийн цагдаагийн албаны даргын зам тээврийн гэмт хэрэг, осол зөрчлөөс урьдчилан сэргийлэх, цэргийн тээвэрлэлт хөдөлгөөний аюулгүй байдлыг хангуулах талаар гаргасан тушаал, зааврыг таниулах, ойлгуулах, сурталчилах;

45.4. Ангиудын жолооч, техникийн ажилтнуудаас тушаалын хэрэгжилтийг хэрхэн биелүүлж байгаад хяналт тавьж, шалгалт явуулах;

45.5. Тээврийн цагдаагийн албаны Урьдчилан сэргийлэх, олон нийттэй харилцах хэлтэстэй хамтран ажиллах;

45.6. Зэвсэгт хүчний алба хаагчдын хувийн автомашинтай хөдөлгөөнд оролцож байх үедээ гаргасан зам тээврийн гэмт хэрэг, осол зөрчлийн талаарх мэдээллийг орон нутаг, дүүргүүдийн замын цагдаагийн хэлтэс, тасгуудаас авч дүн шинжилгээ хийх;

45.7. Орон нутаг, дүүргүүдийн Замын цагдаагийн хэлтэс, тасгуудтай ослоос учирч болох хохирлыг багасгах талаар хамтран ажиллаж, албаны, бүрэлдэхүүнийг бодитой, шуурхай мэдээллээр хангах;

45.8. Зэвсэгт хүчний хэмжээнд гарч байгаа зам тээврийн осол, зөрчлийн шалтгаан нөхцөлд дүн шинжилгээ харьцуулалт хийж зөрчил дутагдлыг давтан гаргахгүй байх сургалтыг зохион байгуулах;

45.9. Албаны хөдөлгөөний аюулгүй байдал хариуцсан зохицуулагч нарыг Зэвсэгт хүчний ангид ажиллахад сургалтын материал, гарын авлагаар хангах;

45.10. Иргэд, алба хаагчдын санал, хүсэлтийг үйл ажиллагаандаа тусган хэрэгжүүлэх, хуулийг дээдлэх, авилга хүнд суртлыг таслан зогсоох, шуурхай байдлыг хангах зорилгоор зохицуулагч, зохицуулагч-цагдаа нарт сургалт явуулах;

45.11. Хэвлэл мэдээллийн байгууллагуудтай хамтарч ажиллах;

45.12. Захиргааны хэрэг бүртгэгч, зохицуулагч нартай зам тээврийн гэмт хэрэг, осол зөрчлийн газарт очиж хамтран ажиллаж зураг авах, видео бичлэг хийх;

45.13. Осол хэргийн нөхцөл байдалд дүн шинжилгээ харьцуулалт хийж, удирдлагыг үнэн бодит мэдээллээр хангах;

45.14. Албаны дарга ахлах зохицуулагчийн өгсөн үүргийн дагуу хамгаалалт зохицуулалтанд үүрэг гүйцэтгэх;

45.15. Хариуцуулсан нутаг дэвсгэрт хөдөлгөөний аюулгүй байдлыг хангуулах, гудамж замд хяналт, шалгалт, зохицуулалт хийнэ.

ЗЭВСЭГТ ХҮЧНИЙ ТЭЭВРИЙН ХЯНАЛТЫН АЛБАНЫ ЦАГДАА-ЗОХИЦУУЛАГЧ

46. Албаны үйл ажиллагааг хэвийн жигд хангахад дэмжлэг үзүүлэх, БХЯ, ЗХЖШ-ын гадаад харилцаа, хамтын ажиллагааны чиглэллээр ирсэн зочид төлөөлөгчид, Зэвсэгт хүчний анги, байгууллагуудын хээрийн гаралт, дадлага сургууль, цэргийн цувааны хамгаалалтанд хөтөч машинтайгаар ажиллах, гудамж замд хяналт-зохицуулалтын үүрэг гүйцэтгэх, албаны тээврийн хэрэгсэл, тусгай тоноглолын бүрэн бүтэн байдлыг хариуцаж ТХА-ны даргад шууд захирагдана.

Автотехникийн хяналтын албаны цагдаа-зохицуулагчийн үүрэг:

46.1. Гудамж замд хяналт-зохицуулалтын үүрэг гүйцэтгэж ажиллах;

46.2. Зам тээврийн ослын газарт шуурхай очиж, ослын газрын үзлэг явуулахад зохицуулагч нарт дэмжлэг үзүүлэх;

46.3. Замын хөдөлгөөний хууль, дүрэм зөрчсөн жолоочид захиргааны хариуцлага ноогдуулах, журамлагдсан тээврийн хэрэгслийн талаарх мэдээллийг зөрчлийн бүртгэлд цаг тухайд нь бүртгэх;

46.4. Автомашины техникийн үйлчилгээг автомашины ашиглалтын зааврын дагуу тогтоосон цагт чанартай хийх;

46.5. Автомашины тусгай тоноглолын ажиллагааг хариуцаж байнга

ажиллагаатай байлгах;

46.6. Албаны эргүүл, жижүүрийн үүрэг гүйцэтгэнэ.

ТЭЭВРИЙН ХЯНАЛТЫН АЛБАНЫ ЭРГҮҮЛ

47. Хүрээний тээврийн хяналтын албаны эргүүлд ТХА-ны бие бүрэлдэхүүн, шаардлагатай үед ангиудын техникийн албаны офицер, ахлагч нараас томилон ажиллуулж болно.

Тэр нь ТХА-ны даргад шууд захирагдана.

Тээврийн хяналтын албаны эргүүлийн үүрэг:

47.1. ТХА-ны эргүүл нь Замын хөдөлгөөний аюулгүй байдлын тухай хууль, Замын хөдөлгөөний дүрэм, Батлан хамгаалахын сайд, ЗХЖШ-ын даргын цэргийн тээвэрлэлт замын хөдөлгөөний аюулгүй байдалтай холбогдуулан гаргасан тушаал, шийдвэрийн хэрэгжилтэд хяналт тавих;

47.2. Эргүүлийн ахлагчаар ТХА-ны хөдөлгөөний аюулгүй байдал хариуцсан зохицуулагчийг томилох;

47.3. ТХА-ны эргүүл нь үүрэг гүйцэтгэхдээ жолооч нарт дохиур мод, шүглийн тусламжтайгаар дохио өгч, тээврийн хэрэгслийг зогсоох;

47.4. Авто тээврийн хэрэгслийг шалгахын тулд эргүүл нь жолоочид хандан ёсолж, цэргийн цол, албан тушаал, нэрээ хэлж мэндлэн, хэрэв харилцагч хүсвэл хувийн дугаараа хэлж, албаны үнэмлэхээ гарт өгөхгүйгээр харуулж, автомашиныг зогсоосон шалтгаанаа мэдэгдэнэ: **“Амрыг эрье! Хүрээний техникийн эргүүл ахлах дэслэгч..... Та бичиг баримт, тээврийн хэрэгслээ шалгуулна уу?”**.

47.5. Цэргийн хүрээний ангиудын авто тээврийн хэрэгслийн жолооч нараас замын хөдөлгөөний дүрмийг биелүүлж байгаад хяналт тавих, согтууруулах ундаа, мансууруулах бодис, сэтгэцэд нөлөөлөх эм бэлдмэл хэрэглэсэн, эрхийн үнэмлэхгүй, улсын дугааргүй, техникийн гэрчилгээ, улсын үзлэг тооллогод ороогүй, техникийн стандартын шаардлага хангаагүй бүрэн бус зөрчил гаргагчидад хууль тогтоомжийн ямар заалтыг зөрчсөн, захиргааны хариуцлагын тухай аль заалтаар ямар шийтгэл ногдуулах талаар тайлбар өгөх;

47.6. Ангиудаас томилогдсон эргүүл нь зөрчил гаргасан авто тээврийн хэрэгслийн өнгө, марк, улсын дугаар, зөрчлийн хэлбэрийн талаар ТХА-ны эргүүлийн ахлагчид мэдэгдэх;

47.7. цэргийн тээвэрлэлт, замын хөдөлгөөний дүрмийн зөрчил гаргасан авто тээврийн хэрэгслийн жолоочийг саатуулах, саатуулах боломжгүй үед тээврийн хэрэгслийн ангилал, улсын дугаар, зөрчлийн байдал, үйлдэгдсэн цаг хугацааны талаар ТХА-ны дарга, Тээврийн цагдаагийн албаны жижүүрт мэдэгдэх;

Тээврийн хяналтын албаны эргүүлийн эрх:

47.8. ТХА-ны эргүүл нь Монгол улсын “Замын хөдөлгөөний аюулгүй байдлын тухай хууль”, цэргийн тээвэрлэлтийн дүрмийг мөрдүүлэх, хариуцлага тооцох;

47.9. Зөрчил гаргасан авто тээврийн хэрэгслийн жолооч, техникийн ажилтны тухай холбогдох ангийн удирдлагад мэдэгдэж, арга хэмжээ авахыг шаардах;

47.10. Бүрэн бус тээврийн хэрэгслийг замын хөдөлгөөнд оролцуулахгүйгээр

түр саатуулах;

47.11. Зам тээврийн осол, хэрэг зөрчилд холбогдсон иргэд, аж ахуйн нэгж, байгууллагын тээврийн хэрэгслийг түр саатуулж, Тээврийн цагдаагийн албаны жижүүрт мэдэгдэж, харъяаллын дагуу шилжүүлэх;

47.12. Зам тээврийн осолд холбогдсон тээврийн хэрэгслийг албаны ачигч машинаар ачиж тээврийн хэрэгслийг түр саатуулах байранд байрлуулана. Энэ тухай тээврийн хяналтын албаны дарга, ахлах зохицуулагчид мэдэгдэх;

47.13. ТХА-ны эргүүл нь ЗХЖШ-ын шуурхай жижүүр, Тээврийн цагдаагийн албаны жижүүрүүдтэй байнга холбоотой ажиллана.